

**24 SEPTEMBRIE**  
**RUGACIUNEA 4**  
**SF.CUVIOS**  
**SILUAN ANTONOV**  
**DE LA SF.PANTELIMON-ATHOS**

**Молитва**

О предивный угодниче Божий, отче Силуане! По благодати, тебе от Бога данной, слезно молитися о всей вселенной, мертвых, живых и грядущих, не премолчи за нас ко Господу, к тебе усердно припадающих и твоего предстательства умильно просящих. Подвигни, о всеблаженне, на молитву усердную Заступницу рода христианскаго, Препоблагословенную Богородицу и Приснодеву Марию, чудно призвавшую тя быти верна делателя в Ея земнем вертограде, идеже избранницы Божии о гресех наших милостива и долготерпелива быти Бога умоляют, во еже не помянути неправд и беззаконий наших, но, по неизреченней благодати Господа нашего Иисуса Христа, ущедрити и спасти нас по велицей Его милости. Ей, угодниче Божий, с Препоблагословенною Владычицею мира,

Святейшею Игуменею, и святыми подвижники Ея земнаго жребия, испроси у святых Святейшаго Слова Святей Горе Афонстей и боголюбивым пустынножителем ея от всех бед и наветов вражиих в мире сохранитися, да Ангелы святыми от зол избавиemi и Духом Святым в вере и братолюбии укрепляеми, до скончания века о Единой, Святей, Соборней и Апостольстей Церкви молитвы творят и всем спасительный путь указуют, да Церковь земная и Небесная непрестанно славословит Творца и Отца Светов, просвещающи и освящающи мир в вечней правде и благодати Божией. Народом всего мира испроси благоденственнаго и мирнаго жития, духа смиренномудрия и братолюбия, добронравия и спасения, духа страха Божия, да не злоба и беззаконие ожесточают сердца людская, желающе истребити любовь Божию в человецех и низвергнути их в богопротивныя вражду и братоубийства, но в силе Божественныя любви и правды, якоже на Небеси, и на земли да святится имя Божие, да будет воля Его святая в человецех и да воцарится мир и Царствие Божие на земли. Такожде и земному отечеству твоему, земли Российстей, испроси, угодниче Божий, вождеденнаго мира и Небеснаго благословения, во еже, всемогущим омофором Матере Божия покрываему, избавитися ему от глада,

губительства, труса, огня, меча, нашествия иноплеменников и междоусобных брани и от всех враг видимых и невидимых, и тако же быти ему до скончания века святейшему дому Преподобнословенныя Богородицы, Креста Животворящаго силою, и в любви Божией неоскудеваемому утвердиться. Нам же всем, во тьму грехов погружаемым, и покаяния тепла, ниже страха Божия не имущим, и сице безмерно любящаго нас Господа непрестанно оскорбляющим, испроси, о всеблаженне, у Всещедрого Бога нашего, да Своею всесильною благодатию Божественне посетит и оживотворит души наша и всяку злобу и гордость житейскую, уныние и нерадение в сердцах наших да упразднит. Еще молимся, о еже и нам, благодатию Всесвятаго Духа укрепляемым и любовию Божиею согреваемым, в человеколюбии и братолюбии, смиренномудрии и молитвенном сраспинании друг за друга и за всех, в правде Божией утвердиться, и в благодатней любви Божией благонравно укрепиться, и сынолюбне Тому приблизиться. Да тако, творяще Его всесвятую волю, во всяком благочестии и чистоте, временнаго жития путь непостыдно преидем и со всеми святыми Небеснаго Царствия и Его Агнчаго брака сподобимся. Ему же от всех земных и Небесных да будет слава, честь и поклонение, со

Безначальным Его Отцем, Пресвятым и Благим  
и Животворящим Его Духом, ныне и присно, и  
во веки веков. Аминь.